



Inatsisartunut ilaasortaq  
Villy Olsvig, Inuit Ataqaqatigiit  
/Maani

### §37 naapertorlugu apeqquteqaat nr. 284 Sisimiut aamma Kangerlussuup akornanni ATV-nut aqqusineq pillugu tunngasumut akissut

30-01-2018  
Suliaq normu: 2017-28536  
Dok. nr. 7004903

Asasara Villy Olsvig

Ulloq decemberip 18-at 2017, Naalakkersuisunut apeqquteqaammik saqqummiussivutit, Sisimiut aamma Kangerlussuup akornanni ATV-nut aqqusineq pillugu pilersarusiorneq sumut killissimanersoq paaserusullugu. Apeqqutit uannit akisassanngorlugit innersuunneqarput.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

#### 1. Naalakkersuisut Qeqqata Kommunalu Kangerlussuaq-mi mittarfeqarneq pillugu pilersarusioqatigiinnissamik suliniutit sumut killippa?

**Akissut:** Siornatigut ilisimatitsissutigineqareersutut Naalakkersuisut naalakkersuisooqatigiinnissamat isumaqatigiissut malillugu sulipput, taamaattumillu suleqatigiissitamik, Qeqqata Kommunianit aamma Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfimmi atorfilittaannik inuttaqartumik pilersitsipput, taassumalu siunissami Kangerlussuarmi Mittarfeqarfik pillugu pilersaarutaasinnaasunik assigiinngitsunik misissuinerit ingerlappai. Tassunga ilanngullugu mittarfeqarfimmi isertitat aningaasartuutillu paasiniaqqissaarneqarnerannik, taamatullu mittarfiup takissusaa apeqqutaatillugu aningaasaleeqqinnissamik pisariaqartitsineq. Aammattaaq mittarfeqarfimmut attuumassuteqarsinnaasut allat pillugit pisussaaffiit misissorneqarput, taakkununga ilanngullugit assersuutigalugu illersornissaqarfik aamma amerikamiut naalagaaffiat.

Suliaq itisiliiffiusumik ingerlanneqarpoq, aammalu peqqissaartumik misissueqqissaarnerit tunngavigalugit ingerlanneqarluni. Suliaq 2017-imi juunimili ingerlavoq, pisariunerulu peqqutaalluni 2018-ip ingerlanerani naammassineqarnissaa naatsorsuutigineqarluni. Tamatuma saniatigut misissueqqissaarnerni ornigulluni misissuineri nalunaarusiat kiisalu 2015-imi aamma 2016-imi Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfik sullillugu mittarfimmi qilleraluni misissuinerit tunngavigineqarput.

Qeqqata Kommuniata suleqatigiissitami sumiiffiup siunissami takornariartitsivittut periarfissaanera pingaartippaa. Suleqatigiissitat suliaminnik naammassinnippata taakkua nalunaarusiaat politikikkut suliarineqassalluni saqqummiunneqassaaq. 2018-ip ingerlanerani suleqatigiissitap suliamik naammassinninnissaat naatsorsuutigineqarpoq.

## **2. ATV-nut Sisimiut Kangerlussuaq aqqusiassatut pilersaarutaasumut tunngatillugu VVM pillugu suliaq sumut killippa?**

**Akissut:** Pinngortitamut Avatangiisinullu Naalakkersuisoqarfik ilisimatitsivoq, 2017-ip ingerlanerani Qeqqata Kommuniata VVM-imik nalunaarutaa aamma suliniummut "Kangerlussuarmit Sisimiunut aqqut" tassaasoq Kangerlussuarmit Sisimiunut aqqusinniornissamik imalik pillugu pilersaarussiaq sukumiisoq (Terms of Reference) suliarisimallugu. Aqquserniassaq taanna Sisimiut eqqaani imeqarfiup killeqarfia aqqusaarlugu ingerlavoq. Qeqqata Kommuniat suliniummik piginnittuusoq novemberimi 2017-imi naalakkersuisoqarfinnut nalunaaruteqarpoq suliniut immikkoortunut marlunnut avinneqassasoq. Suliniummi immikkoortoq siulleq tassaavoq Kangerlussuarmit aqqusineq Kangerluarsuk Tulleq-mut killilik. Pinngortitamut Avatangiisinullu Naalakkersuisoqarfik ilisimatitsivoq VVM-imik nalunaarut utaqqineqartoq, taanna Kangerluarsuk Tulleq-mit Sisimiunut aqquserniassamut tunngavoq.

## **3. Kangerlussuaq pillugu pilersaarusiassanut tunngatillugu ATV-nut aqqutaanani aqqusinivittut aqqusiarineqarsinnaanera nalilersuinermi ilaatinneqarsinnaassanerluni?**

**Akissut:** Qeqqata Kommuniata kommunip pilersaarutaanut tapiliussami nr. 22, 957-N7, siunnerfigaa ATV-nut aqqutissamik/nunap nammineq ilusaani illinermik pilersitsinissaq, tamaani nunap qaava aserorterani ATV-nut aamma ingerlatinit nunakkoorutaasinnaasunut aqqusineqarnissaa. Kommunip pilersaarutaanut tapiliussaq takuuk.

Tamatuma saniatigut paasissutissiissutigisinnaavara ATV-nut illinernik imaluunniit aqqusinivimmik pilersitsisoqassappat, tamanna Aningaasaqarnermut Akileraartarnermullu Naalakkersuisoqarfiup piumasaqaatai naapertorlugit inuiaqatigiit aningaasaqarneranut sunniutaasinnaasunik misissuisitsinermik ingerlatsiffiqineqaaqqaassammat, ukiumoortumik aningaasanut inatsimmi tullermi aningaasaliiffiqineqarnissamut pingaarnersiukkanut ilanngunneqartussat akornanniissaguni.

Naggasiutigalugu [www.naalakkersuisut.gl](http://www.naalakkersuisut.gl) aqqutigalugu tusagassiorfinnut nalunaarut, 14. november 2017-imeersoq, Sisimiut Kangerlussuullu akornanni aqquserniassaq pillugu suliaq allattorsimaffiitut aammalu suleqatigiissitamik pilersitsinermut tunngasoq eqqumaffigeqqussavara.

Suleqatigiissitap 1. april 2018 nallertinnagu nalunaarusiamik Naalakkersuisunut aamma Kommunalbestyrelsimut saqqummiussisinnaanissaa naatsorsuutigineqarpoq.

Neriuppunga qulaani allaqqasuni apeqquutit akineqartut.

Inussiarnersumik inuulluaqqusillunga



Erik Jensen